

I Pita Momoe

Na Podapodalaina na Leta

¹ Ara Pita maka tinoni tagarunuqu ti Jisu Karisito za qa korapa kuti lao tadigamu na tinoni tamijatamiu tana Tamaza gamu korapa okoto suvere vei na tinoni gotomiu pana okokoto guguzu pa Ponitasi, pa Qelesia, pa Kapadosia, pa Esia beto pa Bitini.

² Gamu za pa nana nyorogua tu na Tamaza na Tamada za mijatagamu beto za tori vamadigamu tu na Ongu Tabuna, ko muna tutia gamu za i Jisu Karisito ura gamu tori tavalioso tu pana orunguna aza za gamu.

Na vairoqu varialona beto na bule mi vonuvonu tadigamu.

Taqe Adono Gelegele ura i Jisu za tori Turu Mule tu

³ Za pada vitivitigi ko mina tavatarazae za na Tamaza na Tamana na nada Bangara i Jisu Karisito. Ura aza za roquroqu toka vitivitiginigita ko za vadigita na toa koregana. Ko za vei za taqe korapa adono gelegele voleanani gita za na toa vinaori ura i Jisu Karisito za tori toa mule tu pana uke.

⁴ Taqe tori tekua tu gita za na toa koregana ko za vei za taqe korapa adonia za na toa za taringutinguti vakole vadigita pa noka na Tamaza. Ko na toa za taringutinguti vakoleni na Tamaza ani za zake boka nyabo na paji beto zake boka manyao.

⁵ Ko gamu za gamu rangea aza vei za gamu korapa takopu vasare pana neqi tana Tamaza ko tinganai muna tekua tu gamu za na inaalo za tori vanaqiti vakoleni tu na Tamaza ko mina vagore votua pana vinabetobetona na totozo za gua.

⁶ Ko za vei za mu qeradi za ria na zakazava mari gore votu uka riza, ba pana iapeki totozo ari za gamu korapa takulanga za gamu tonai gamu korapa gozororia zoku tapata.

⁷ Ba na ginuana qari lame ria na tapata ari za vei ko mina tadogoro pikata za na zozotona na rangerange tadigamu. Na qolo za maka zakazava za boka tapiara pale gu ba za tapodeke tu pa iku aza. Ba na rangerange tadigamu za poreveveina jolani na qolo ko za vei za mina tapodeke tugu pana tapata. Tonai tu mina tapodeke za mina tadogoro pikata za na rangerange zozotona aza, beto za mina ovulugamu beto na valavatagamu na Tamaza za gamu tonai mina mule lame i Jisu Karisito.

⁸ Gamuke batia gamu i Jisu ba gamu korapa tugu roquroqua, beto koviria ba gamuke korapa tugu batia gamu aza ba gamu korapa tugu vazozotoa. Beto ko gamu izongia za na qeraqera lavatana jola zake boka tavakole pana vavakato.

⁹ Ura gamu korapa tekua tugu gamu za na vuana na miu rangerange ko na vua aza za na veveina na Tamaza za aloria na miu toa.

¹⁰ Ko na veveina na inaalo ani za qari kole nyago vitivitigia beto qari dogoro vilovilotia ria na tinoni korokorotai pa moa, beto qari ule votuni za na varivana aza mina vadigamu gamu za guni na Tamaza.

¹¹ Ko qari podeke dogoro pikatia ria za ae totozo veveina beto ae mina vevei za na lame tana. Aza za na totozo za udukia na Ongonguna na Karisito za kole tadiria tonai za korokorotoni za na vitigi mina gozororia na Karisito beto na zakazava vari-vagabaradi mari tuti lame pa liguna mina gozororia aza ria na vitigi beto ko mina tavaturu mule aza.

¹² Na Tamaza za vakaberia pana tadiria na tinoni korokorotai za na zakazava qari korokorotodi za nake dia makadi gu goto na vei ko na tokadigamu gamu tugu vei. Ko na zakazava ari za qari tori ule vadigamu tu ria qari vavakatoni na nongoro leana tadigamu. Na Ongu Tabuna aza na tagarunu lagerena pa noka za vadi ria na neqi ria ko qari vavakato vadigamu za na nongoro leana. Ko ria na mateana ba qari nyorogua gilagilaria tugu ria doru zakazava qari gore votu ari ba qarike boka batia.

Mu Toani na Toa Liosona

¹³ Ko za vei aza za, mu vatana valeania na roqumiu vei na tinoni za saqiti vazaea nana poko ko za vanaqiti ko mi roiti za gua. Muke ilalo lao lame goboro pana miu toa, mu vakolea doruna na miu rangerange pana variroqu varialona aza muna tekua tonai mina mule lame i Jisu Karisito.

¹⁴ Mu toani na toa vatabe ko muke vamalumuria na miu nyorogua ikikeredi pa moadi keta mari toka vapiru veidigamu tonai gamu oqoro gilagilai na tuvizi.

¹⁵ Goto pana doruna na miu uana za mu toani tu na toa liosona, maka moqaza podeke vei na Tamaza aza za kukugamu ba na liosona tugu.

¹⁶ Ura ari za gua vei za na Kutikuti Tabuna, <<Mu toani na toa liosona za gamu ura ara za na liosoqu,>> za gua na Tamaza.

¹⁷ Aza na Tamaza zake tokatoka kale tonai za tutidi ria na roiti tadiria na tinoni za gamu gicalani na Tamamiu gamu. Ko za vei aza za mu pangagani na Tamaza pa doruna na miu uana tonai gamu korapa suvere vei na tinoni gotomiu pa kasia guguzu ani.

¹⁸ Ura gamu tori gilagilaimiu tu gamu za na zona vei beto gamu taruvata. Nake zakazava vevei na qolo beto na siliva za gamu tapajukuni gamu pana miu toa gobogorodi qari vakarovo vadigamu ria na miu tite. Na qolo beto na siliva za qari boka tavakepore veveidi gu.

¹⁹ Ba gamu za gamu tapajuku pana orunguna tu na Karisito tonai za uke, ko aza za na vavavui za vei na lami liosona kepore na pajina.

²⁰ Tonai tu za oqoro tavapodaka na kasia guguzu za tori mijatia tu na Tamaza aza ko mina alogita, beto pana totozo betobetodi ari za bola votu aza pana laemiu gamu.

²¹ Ko tonai gamu rangea gamu na Karisito za gamu vazozotoa gamu na Tamaza aza za vaturu mulea pana uke i Jisu beto za vani na vinalavata. Ko na rangerange tadigamu beto na miu adono valeanani na taringutinguti tana Tamaza za qari pasusu gu pana tana.

Mu Toani na toa Variroqu

²² Ego tonai gamu vatabea gamu za na non-goro zozotona za gamu tori tavalioso tu pana

miu toa ikikeredi beto ko gamu roquroquia pana variroqu zozotona ria na turamiu. Ko koviria mu ngalingalini gamu pa bulomiu za na toa makarai variroqu.

²³ Ura gamu tori podo mule tu za gamu. Ba nake pana tana tinoni za boka uke za gamu podo mule lame vei za gamu goto tonai gamu vazozotoa na paranga toana beto na kole jolana tu tana Tamaza aza zake boka uke.

²⁴ Vei za pojai na Kutikuti Tabuna ari za gua vei, <<Doru tinoni za qari vei gu na buruburu beto doruna na dia batabata lea za vei gu na gavoro pirudi.

Na buruburu qari malei uke
beto na gavorodi qari udodia,>>

²⁵ ba na paranga tana Bangara za kole jola kamua na kamua, za gua.

Ko na paranga ani za aza tugu na nongoro leana za tori tavavakato tu tadigamu.

2

Na Patu Toana beto na Butubutu Madina

¹ Mu loi paledi ria doru roiti ikikeredi, doru sekeseke, na konokonoa beto na poja vikevikeria na goto tinoni.

² Maka moqaza podeke vei tugu na melalu za nyorogua susu vitivitigi nari za gamu ba mu kidepe vitivitigi veini tugu aza za na paranga tana Tamaza. Ko muna nongoria beto muna tutia gamu za pala muna pidoko zae ko muna taalo za gamu.

³ Ura gamu tori valingilingia tu gamu za na variroqu tana Bangara.

⁴ Mu lame tata tana Bangara. Aza za na patu toana qari kilu pale ria na tinoni, ba aza tugu za na poreveveina pana mijamijata tana Tamaza.

⁵ Gamu makamiu za gamu vei na patu toana ko mu somana tavaroitia pana vaturuna na ruma tabuna za roitini na Ongu Tabuna. Ketakoi muna roiti vei ria na iama madidi za gamu ko muna pogoza lamedi na vavavui liosodi aza za vaqerai na Tamaza pa ginuana na roiti za roitini i Jisu Karisito.

⁶ Ura na kolena pana Kutikuti Tabuna za na paranga ani:

<<Dogoro! Qa vakolea maka patu pa Zaione
na patu vizovizo tamijatana beto
poreveveina.

Ko na tinoni za vakolea nana totoravuzu tana
za minake tavakea,>> za gua.

⁷ Ko gamu gamu vazozotoa na Karisito za gamu valavatia aza, goto ria qarike vazozotoa ba za korapa tugu poreveveina aza, vei za pojai na Kutikuti Tabuna, ari za gua vei,

<<Na patu qari kilu pale
ria na tinoni vavaturu ruma,
aza tugu za na kuta patu vizovizo,>> za gua.

⁸ Beto aza vei za pojai mule na Kutikuti Tabuna za ari za gua vei,

<<Maka patu varivalotuna

2:3 Kera Vatarazae 34.8. **2:4** Kera Vatarazae 118.22; Aisea 28.16.

2:6 Aisea 28.16. **2:7** Kera Vatarazae 118.22.

beto maka patu lavata varivatatupena,>> za gua.

Qari tatupe ria ura qarike vazozotoa ria za na paranga tana Tamaza. Ko qari gozoria tugu ria aza vei qari taleveni ko mari gozoria.

⁹ Ba gamu za na tinoni tamijatamiu, na iama tuti bangara, na puku tinoni liosomiu, beto nana makana na Tamaza za gamu. Gamu za gamu taudukuni ko muna vavakato votuni za na roiti varivagabaradi tana Tamaza, aza na Tamaza za kuku votudigamu pana rodomo ko za vavotu lamegamu pana nana kabere.

¹⁰ Pana totozo qari jola lao rari nake tinoni tana Tamaza za gamu, ba koviria za na nana tinoni aza za gamu. Pana totozo qari jola lao rari gamuke valingilingia gamu za na variroqu varitokai tana Tamaza, ba koviria za gamu valingilingia za na variroqu varitokai aza.

Mu Toa Vei na Nabulu tana Tamaza

¹¹ Ka viza baere leana, qa tepa vitivitigigamu ara za gamu gamu suvere vei na tinoni gotomiu beto na tinoni kamumiu ko mu loi paledi ria na nyorogua ikikeredi qari vei na kana pana toa tini.

¹² Pana miu suvere varisomanai tadiria tinoni karovodi za mu valeania za na miu uana. Ko tonai mari jutudigamu na tinoni ikikeremiu nari za mu vabatidi na miu roiti leadi ko tonai mina lagere tutidi na tinoni na Tamaza nari za mari vatarazaea ria za na Tamaza.

¹³ Pana valavatana na Bangara za mu vataberia ria doru tinoni qari taudukuni za na neqi ko qari suvere pa qavuna. Mu vatabea na kuta bangara

lavata pa qavuna beto mu vataberia tugu ria na tinoni varitoka za mijataria aza.

¹⁴ Ria tugu ria na tinoni za mijataria aza ko mari vakilasaria ria na tinoni ikikeredi beto mari valavataria ria na tinoni qari roitini na leana.

¹⁵ Ura na nyorogua tana Tamaza za ria na tinoni ikikeredi za mari nogoto poja vikevikeregamu pana dia zona ikikeredi za gamu tonai mari batiria ria za na miu roiti leadi muna roitidi gamu.

¹⁶ Mu suvere vei ria na tinoni taruvatamiu. Ba muke varoitia na miu toa taruvatana ko bu roitidi ria na zakazava ikikeredi, goto mu toa vei tu na nabulu tana Tamaza.

¹⁷ Mu pangagadi za ria doru tinoni, mu roquro-quria za ria gamu gamu makarai rangea na Karisito, mu valavatia na Tamaza beto mu pangagani za na kuta bangara lavata pa qavuna.

¹⁸ Gamu na pinauzu za mu tuti vapekai beto mu pangagadi za ria na miu bangara. Ko nake ria gu makadi na bangara qari leana beto qari valeana lao tana goto tinoni za muna veidi, goto ria na bangara qarike voleanagamu ba mu veidi tugu.

¹⁹ Ura na Tamaza za qerani za na tinoni tonai bi gozoria na tapata ba za gilagilai na tinoni aza za na monanana na Tamaza, ko za varajani gu aza za na vitigi zake pada ko bi gozororia aza.

²⁰ Tonai gamu roiti vasela ko gamu tapiqolo taledi gamu ria na sela gamu roitidi ba gamu vangajuria gu za na vitigi ria. Ba kepore maka zakazava leana bu tekuni gamu za na tapata gamu gozoria tonai. Goto tonai gamuke kilasadi gamu ria na vitigi gamu gozororia tonai gamu roitidi na roiti leadi, za aza za vaqerai na Tamaza aza.

²¹ Ko na toa vei zara za za kukudigamu na Tamaza gamu. Ura na Karisito za tori gozororia tugu ria na vitigi ko za tokadigamu za gamu beto ko za vakole vadigamu aza za maka vinapadapada leana ko gamu ba muna rerege tutia za na pou nenena aza.

²² Kepore maka sela bi roitini beto kepore maka sekeseke bi tanongoro pa nana paranga aza.

²³ Tonai qari poja tarini doru paranga ikikeredi, nari zake sogalaodi na paranga ikikeredi. Tonai qari vani na tapata, nari zake variperanana ko bi vanogotoria, goto za vakole laoa na nana toa tana Tamaza tu aza za varituti pana tuvizi.

²⁴ Na Karisito za pogožia pana tinina tonai za uke pa korosi za na vinakilasana na sela tadigita. Ko za vei za gita tage taruvata pana neqi tana sela ko tage toani na toa tuvizina. Pana palekana aza za gamu tasalana za gamu.

²⁵ Perangaina gamu vei na sipi mumana za gamu ba koviria gamu tori tatoka mule lao tu tana Karisito aza na sepati beto aza za kopuni na miu toa.

3

Na Vavanau tadiria na Tiolata Reko beto na Tiolata Marene

¹ Beto ko gamu na tiolata reko ba mu tuti vapekiria ria na marenemiu. Ko vei ria kaki za bari oqoro vazozotoa na paranga tana Tamaza nari za pala mari boka tavagabala ko mari vazozotoa tonai mari batia na uana leana tadigamu na

maqotadi. Ko munake kilu pojadi maka paranga gamu za beto mari tavagabala ria na marenemiu

² goto tonai gu mari batia na miu uana liosona za kolea na pangaga.

³ Muke sari vabatabata leanaria gu na zakazava vevei na vinyulu vurungu, na pakupaku teteri qolo beto na poko sasari za na peguru tinimiu.

⁴ Goto na miu uana tu za koko lame vei pana bulomiu za mu sarini na zakazava qarike nyabo vikevikere vevei na uana nake tuara beto na uana bulebule. Na sari vevei tu ari za dogoro poreveveina pana tana Tamaza.

⁵ Ura pa moa za ani tugu za na zona qari tutia ria na reko madidi qari totoravuzia na taringutinguti tana Tamaza. Qari sari vabata leania za na dia toa tonai qari suvere vapekai pana tadiria na marenedi.

⁶ I Sera za maka reko za vei aza. I Sera za vainongoro lao ti Ebarahami beto za kukuni na nana bangara i Ebarahami. Ko gamu ba koviria muna vei tugu i Sera vei muna roiti valeana beto vei munake matagutuni maka za.

⁷ Ko gamu na tiolata marene ba mu gilagila valeanaria tugu ria na maqotamiu tonai gamu suvere tavitiria ura qarike neqi vei gamu na marene ria. Mu pangagadi ria na maqotamiu ura ria beto gamu za pala muna makarai izongia tugu za na toa jola aza na varivana tana Tamaza. Ko muna roiti vei gamu ari za na miu varavara ba marike takoloso.

Gozoro Taleni Vitigi na roiti Tuvizina

⁸ Na qua vavanau betobetona ani. Mu makarai suvere maka pana uana leana pana toa, mu

makarai maka pana roqueroquna na goto tinoni, mu makarai variroqu vei na tamatazi tana Karisito, mu makarai izongia na bulo variroqu, beto mu vapekai muledigamu pana tadiria na tinoni.

⁹ Muke vamule sogu vadi na ikikerena ria qari roiti lameni na ikerena pana tadigamu, beto muke gonadi na paranga ikeredi ria qari gonadigamu na paranga ikeredi. Goto mu tepa vadi tu na mana ura na mana tu za za kukudigamu na Tamaza ko muna teku izongia gamu.

¹⁰ Zara tu mu toa vei za gamu, ura ari za tori paranga vei tu za na Kutikuti Tabuna,

<<Na tinoni za nyorogua tekua na toa qeraqera
beto za nyorogua kamuria na rane leadi
za mi nogoto poja vikevikereria ria na tinoni
beto muke vavakatodi za na vavakato seke-
sekedi.

¹¹ Mi nogoto roitini na roiti ikikerena ko mi roitini na roiti leana.

Mi nyoroguani tu beto mi nyaqo vitivitigia tu
aza za na toa bule.

¹² Ura na Bangara za dogoro kopudi ria na tinoni
tuvizi

beto za vainongorodi za na dia varavara,
goto ria na tinoni qari roitini nikerena za zake
tavaraguadi,>> za gua.

¹³ I ze! za mina boka ngangangulugamu gamu
tonai muna ngalingalini na roiti leana? Bi mija tu
maka!

¹⁴ Ba vei bu gozoro taleni tapata tu gamu za na
tuvizi gamu roitini, za tamalea za gamu. Muke

matagutudi ria qari boka vadigamu na tapata, beto muke mamata na takulanga.

¹⁵ Goto mu valavatia pa bulomiu na Karisito na Bangara. Beto mu vatana doru totozo ko mu oe muleria ria na tinoni mari nanazadigamu na veveina na miu vinazozoto za kole pa bulomiu.

¹⁶ Ba tonai mu oeria nari za mu roitini pana pangaga beto pana uana vapekai beto pana monana leana, ko tonai mari aja vagoregoregamu beto mari poja vikevikeria za na miu uana leana vei gamu tutia na Karisito za gamu, za pala mari tavakea makadi ria.

¹⁷ Ura vei mina nana nyorogua tugu na Tamaza za muna gozoro tapata za gamu, nari za leana jola za muna gozoro taleni tapata za na roiti leana. Aza tu za za leana jolani vei bu gozoro taleni tapata ria na roiti ikeredi.

¹⁸ Ura na Karisito za ukeni maka totozo gu za na sela tana goto tinoni. Aza na tinoni tuvizi za ukepaeni ria na tinoni sela, ko za toka vatata laogita tana Tamaza. Na Karisito za tavauke pana tini ba za tavatoa pana ongongu,

¹⁹ ko tonai za gore tarae velavelani aza za na vinakilasa tadiria na ongongu qari tapiu vakole.

²⁰ Ari za ria na tinoni za kole adono vamomozodi na gabaladi na Tamaza pana totozo pa moa tonai za kole roitini na aka i Noa. Ari ka vesu tinoni moqamoqazadi gu za qari luge pana aka ko ria gu za aloria na Tamaza pana kolo.

²¹ Ko aza za gozoria i Noa beto na nana tatamana za na vinagilagila za udukia za na paputaiso aza koviria za alogamu gamu ura i Jisu Karisito za tori turu mule tu. Ba na ginuana na paputaiso za

nake vei ko na valioso paledi na paji pana tini ba na ginuana za gita taqe vazozotoa pana monana leana na Tamaza.

²² Ko i Jisu Karisito za tori zae tu pa noka ko koviria za korapa nyumu pa kale matuana na Tamaza, beto ko za bangaradi za ria dorudi na mateana beto ria na okokoto kuta bangara beto na ongongu neqidi pa vavagalo kota.

4

Mu Toani na toa Gabalana

¹ Na Karisito za tori gozoria tu na vitigi pa korosi, ko gamu ba mu vanaqitini ko mu gilagila valeania za ani: na tinoni za gozoria na vitigi pa tini za tori dainanani tu za na sela.

² Ko na tinoni vevei aza zake tutia za na nana nyorogua ikikerena makana, goto pana doruna na nana toa pa pezo za toani gu za aza vei za nyoroguani na Tamaza.

³ Gamu tori gona paleni totozo kakazana jola tu gamu pana totozo qari jola rari za na roiti qari nyonyorogua roitini ria na tinoni karovodi. Pana miu toa perangaina tonai gamu oqoro vazozoto za gamu kole toadi za na aru vabosi, na nyonyorogua ikikerena tana tini, na toa bukubuku, na varivarigitanaini na toa bukubuku beto na roiti varivakeadi beto na vavatarazae beku varivakeadi jola.

⁴ Ko za vei za qari gabaradigamu za ria na tinoni rodomo ura koviria gamuke varigitanai tavitiria ria pana toa lulasana zozoto qari toani. Ko za vei za qari vakezadigamu doru paranga ikikeredi.

⁵ Ba ria na tinoni ari za pala mina tabata poa na dia toa ikikerena tonai mari turu pa moena na Tamaza. Ko na Tamaza za korapa vanaqiti ko mina tutidi ria na tinoni toadi beto na ukedi.

⁶ Ko pana ginugua vei aza za tori tatarae tu pana tadiria qari tori uke tu za na nongoro leana. Ko pana toa tini qari tapitu vei tugu ria doru tinoni ria, beto ko pana toa ongongu za mari toa vei za nyoroguani na Tamaza.

Mu Varoiti Valeanaria na Varivana tana Tamaza

⁷ Ego za tori rijo tata lame tu za na vinabetona na kasia guguzu ko mu gaiti valeania na roqumiu beto mu suvere kopu ko mu boka varavara valeana.

⁸ Ba aza za poreveveina jola za mu vaneqia na toa variroqu, ura na tinoni za variroqu za boka dogoro vajola pale za na sela tana goto tinoni.

⁹ Mu vakamu valeanaria na goto tinoni beto muke qumiqumidi.

¹⁰ Gita doru za taqe okoto teku varivana tana Tamaza ko tavaroititi valeanaria ria na varivana ari ko ta tokadi na goto tinoni.

¹¹ Aza na tinoni za tarae za mi taraeni za na paranga zozotona tana Tamaza. Aza na tinoni za varitokai za mi varitokai tugu aza pana neqi za vani na Tamaza. Ko vei ari mari vevei ria na uana tadigamu nari za mina tavatarazae na Tamaza pana miu kole maka ti Jisu Karisito. Na Tamaza za pada ko mina tavatarazae, ura aza tugu za izongia za na neqi kamua na kamua. Agua.

Ta Vitigi vei na Karisito

¹² Ka viza baere leana, muke siboro beto na ruradi ria na vitigi mangimanginidi gamu gozororia. Muke dogoro veidi qari kamu goborogamu za ria na tapata qari lame podekia na miu rangerange.

¹³ Ba mu qerani tu gamu za na ginuana gamu somana gozororia ria na vitigi za gozororia na Karisito. Mu qera ko mu boka tavapugeleni gamu za na qeraqera lavata tonai mina tabata za na neqi lavatana tana.

¹⁴ Gamu tamana za gamu tonai gamu tapoja komikomiti pana ginuana gamu vazozotoa gamu za na izongona na Karisito. Ura tonai qari veidigamu zara, nari za na Ongongu neqina jola tana Tamaza za kole somana pana tadigamu.

¹⁵ Tonai bi gozoro tapata za maka gamu, za vavagua jola za mike gozoria aza za na tapata pana ginugua vei aza za na tinoni za varivuke, za ikiko, za vavapodo roiti ikerena, babi na tinoni za rarara karovo pana nana ginugua na goto tinoni.

¹⁶ Ba vei bu gozoro tapata za gamu pana ginuana gamu tutia na Karisito, nari za muke keani gamu za vei aza. Goto tonai za mu paranga leana lao tu za tana Tamaza pana ginugua vei gamu somana pogozi gamu za na izongona na Karisito.

¹⁷ Ura za kamua gu za na totozo tonai mari tatutiria na tinoni pana tatamana tana Tamaza. Ko za podalai pana tadigita za na varituti, ko pala mari tapata vitivitigi ria qarike vazozotoa na nongoro leana za koko lame vei tana Tamaza.

¹⁸ Ura za tori pojai tu pana Kutikuti Tabuna za ari za gua vei,

<<Vei na tinoni tuvizi tu ba za gozoro tapata mae

tu beto za taalo,
nari ae mina koi vei tapatia za na tinoni ikik-
ereba beto na tinoni selana?>> za gua.

¹⁹ Ko za vei za ria na tinoni qari gozoro tapata
pana ginuana qari tutia na nyorogua tana Tamaza
za mari totoravuzia ria za aza za vapodakaria
ko mari vani aza za dorudi na dia toa. Ko mari
vatadogoroni ria na tinoni vevei zara pana dia
roiti za na dia totoravuzu tana, ura aza zake boka
tetea na nana taringutinguti.

5

Na Puku tinoni tana Tamaza

¹ Ko za vei za ria na tinoni matamata pa variko-
rapaimiu gamu za qa korapa tepa vitivigiria ara.
Ara ba maka tinoni matamata tugu beto ko qa
vavakatodi tugu ara ria na vitigi za gozororia na
Karisito pa korosi beto qa somana izongia tugu
ara za na neqi lavatana aza za tata mina tabata
votu tonai mina mule lame aza.

² Maka moqaza podeke vei na sepati za kopudi
na nana sipi, nari za gamu ba mu kopu valeadi
tugu ria na tinoni tana Tamaza gamu korapa
tokaria. Mu kopudi nake vei ko gamu tajutu tarini
gu gamu za, ba mu kopudi pana bulo malumuna
tu aza vei za nyoroguani na Tamaza. Mu roitini na
roiti ani nake vei ko gamu nyonyorogua tekuteku
tabara gu, goto mu roitini ura gamu nyorogua
varitokai zozoto.

³ Muke toka veidi na pinauzu ria qari kole pana
miu kopu, goto mu vabatidi tu za na uana leana
mari tutia.

⁴ Ko tonai mina bola votu za na kuta sepati na Karisito, za muna tekua gamu za na pinia zake murimuri na kilangana.

⁵ Ko gamu na tinoni zae korega ba mu suvere vapekai lao tadiria na tinoni matumatuadi, beto pana miu uana vapekai mu varinabulu lao lame. Ura ari za gua vei za na Kutikuti Tabuna, <<I Tamaza za kanaria ria na tinoni qari valavata muledi makadi,

ba za valeana lao za tadiria na tinoni qari vapekai muledi makadi,>> za gua.

⁶ Ko za vei za gamu mu vapeki muledigamu pa kauru lima evevana na Tamaza, ko aza mina ovulugamu za gamu pana totozo mina mijatia aza.

⁷ Mu vani aza ko mi tapatianadi ria dorudi na miu takulanga ura aza za kopu valeadigamu za gamu.

⁸ Muke ilalo lao lame pana miu roquroqu, mu suvere gelegele! Ura na miu kana aza na bangaradi na tomete za korapa lekoia doru kota. Za korapa rerege vei na laione za ngangara ko za korapa nyaqo tinoni ko mi gani pipiararia za gua.

⁹ Mu kole vamauru pana miu rangerange beto mu raja kolokolosia aza. Ura gamu gilagilaimiu gamu za ria na tinoni tana Tamaza pa kasia guguzu za qari korapa tugu gozororia ria na vitigi pana ginuana qari vazozotoa na Karisito vevei tugu gamu korapa gozororia gamu.

¹⁰ Ba pa liguna muna suvere vitigi pana ia-pekiki totozo papakana, za na Tamaza makana aza za pugelia na variroqu za mina tuvaka

vaturugamamu, mina sori vamaurugamu, mina vaneqigamamu beto mina vaturu vamaurugamu za gamu. Aza za na Tamaza za kukugamu ko muna somana izongia gamu za nana neqi kole jolana, ura gamu gilagilai gamu na Karisito.

¹¹ Aza za na Tamaza za izongia na binangara kamua na kamua! Agua.

Na Paranga Vinaokotona

¹² I Silovanozi za maka tinoni tana Karisito za nago taqu ko qa dogoro rangea ara ko pana varitokai tana za qa kutia ara za maka leta papakana ani. Ko qa paranga vaneqineqigamamu beto qa vavakato vaneqini ara za aza na variroqu vari-alona zozotona tana Tamaza ani. Ko gamu za mu turu vaneqi pana variroqu vari-alona ani.

¹³ Na ekelesia somana tamijatana tugu tana Tamaza pa Babiloni* beto na tuqu marene i Maka za qari garunu laoni na dia roquroqu tadigamu.

¹⁴ Mu varigozoro qeraqera pana variroqu tana Karisito.

Na bule mi somana pana tadigamu na tinoni tana Karisito.

* **5:13** Na izongo **Babiloni** ani za udukia pa Romu. Na totozo tapata tadiria na tinoni tana Karisito za tonai za takuti na leta ani ko zake tapoja lodaka za na izongo Romu.

Kubokota Adapt New Testament **Ghanongga: Kubokota Adapt New Testament (Bible)**

copyright © 2024 The Seed Company

Language: (Ghanongga)

Contributor: Islands Bible Ministries

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

PDF generated using Haiola and XeLaTeX on 2 May 2025 from source files dated 2 May 2025

b15930fb-006d-5d59-8c92-849586c93e2c